



**H**Einricus apud Belgas natus anno circiter 1500. Is post prima artium fundamenta in patria percepta, hinc inde Academias uisitauit, atq; præclaram eruditionē sibi comparauit. Postea in Italiam profectus, Iuris studio incubuit, & Carolo Ruino præceptore usus plurimū profecit. Itaq; summum in ea professione honoris gradum obtinuit. Cum hoc modo eruditione & prudentia celebris esset, in Germaniā patriam redijt, atq; Vuilhelmi ducis Iuliacensis & Cliuensis cancellarius factus est. In ea uocatione sese diligentē præstitit, & res sibi cōmendatas magna diligētia peregit. Nec eo studio contentus, uerū etiam Theologiæ &

Patrum lectionibus operam dedit, atq; suis uigilijs effecit, ut etiā doctis Theologis annumerari queat. Is Heinrichus multis uirtutibus etiamnum superest, & apud Belgas passim ueneranda canitie conspicuus agnoscitur. Anon.